

San Pablo Galacia cheja pa'inare chũ'o tocha saosi'ea'me

Chũ'o saosi'ea'me

¹ Chũ'ũ, Pablo, Jesucristo saosi'kũjekũ pãi chẽa saomanesi'kũa'mũ. Mai Ja'kũ Dios, Repau'te jũniso tãcojñosi'kũre Vasosi'kũ ũcuachi'a chũ'ũre saokũ'mũ Repau chũ'ore chũ'vaa'kũ chini. ² Chũ'ũ mũsanũkonare, Jesucristo'te cuasajũ Galacia cheja pa'ikuanupũã ija'ova utija'ova chũ'ũre icheja ja'me pa'ina mai majapãijanana'me tocha saomũ. ³ Mai Ja'kũ Diona'me Maire Paakũ Jesucristoji mũsanũkona rekoñoãna re'oja'che pa'iche cho'okaijũna re'oja'che pa'ijũ'ũ. ⁴ Repau Jesucristo mai Ja'kũ Diopi chiiũna mai cu'ache cho'oche jũni ro'ikaisi'kũa'mũ, maipi pãi cu'ache cho'onana'me pa'inata'ni cu'are jũvomasijũ re'oja'che pa'imasia'jũ chini. ⁵ Repau Dios si'arũmũ cuhama'ñe pojocojñokũ, "Peore masiũ'mũ mũ'ũ; rũa re'okũ'mũ", chiicojñokũ paau. Jã'aja'ñe paau.

Jesucristo'te cuasache kũachũ'ore jachajũ tũñere chũ'vache'te kũamũ

⁶ Cristo re'oja'che cho'okaisi'ejekũna mũsanũkonare chẽa Paakũ'te Diore cuasache mũsanũkonapi na'mi jo'kasopi'rajũna asa kũkũmũ chũ'ũ. Jesucristo'te cuasache

kũachũ'o asa chẽa cuasasina chura chekere asa chẽajũ pa'ime mũsanũkona. ⁷ Repachũ'o mũsanũkona mama che'chechũ'o vati toa uuche Ũsekaikũ pa'iche'te kũamachũ'oa'me. Pãi Dios chũ'o Cristo pa'iche kũachũ'ore sa'ñe tĩĩne kũajũ cacũ'ojũ pa'ime mũsanũkonare. ⁸ Pãi ũcuauanapi chũkũna mũsanũkonare chũ'vasi'ere Jesucristo'te cuasache kũachũ'ore jachajũ repachũ'o chũ'vama'ñe tĩĩnere chũ'vani vati toare ai sani uujũ paapũ, chũkũnapi jã'apãani ángel cũnaũmũ raisi'kũpi jã'aja'ñe chũ'vanijẽ'e. ⁹ Chura i'kasi'ere jo'e ũcuare i'kara. Chũ'ũpi chũ'vakũna mũsanũkona asa chẽasi'ere Jesucristo'te cuasache kũachũ'ore ũcuauakũji jachakũ repachũ'o chũ'vama'ñe tĩĩnere chũ'vani vati toare ai sani uukũ paau.

¹⁰ Chũ'ũ cho'oche'te pãipi ña pojoa'jũ chini cho'oma'ñe Diopi ña pojoa'kũ chini cho'okũ pa'ikũ'mũ chũ'ũ. Pãipi chũ'ũni pojoa'jũ chini cho'okũ pani Cristo'te cho'oche cho'okaikũ pa'imanera'amũ.

Dios chũ'ore chũ'vaa'kũ chini saosi'kũ cho'osi'ere kũamũ Pablo

¹¹ Asarepajũ'ũ, chũ'ũ majapãijana. Mũsanũkonapi masia'jũ chini i'kamũ chũ'ũ ie: Chũ'ũ mũsanũkonare chũ'vachũ'o Jesucristo'te cuasache kũachũ'o rupũ pãi cuasasichũ'oma'mũ.

¹² Chũ'ũre repachũ'o masiche pãi chekũnapi che'chomanesinaa'me. Jesucristo'ji kũasi'kũa'mũ chũ'ũre jã'a, masia'kũ chini.

¹³ Chũ'ũ Jesure chuta'a cuasamaũ chũkũna judíopãi cuasache cuasakũ pa'irũmũ cho'osi'e asasinaa'me mũsanũkona. Reparũmũ

Jesucristo'te cuasanani ũcuanukore cacu'ora chini repanare chu'ure peore cho'ore'ochetu'ka cu'ache cho'okũ pa'isi'kua'mũ chu'ũ.

¹⁴ Reparũũ chukũna aipãĩ jo'kasi'e judiopãĩ cho'oche peore masi cho'okũ chu'ũ majapãĩ jainukore chu'ũjanare na'a rũa masi cho'osi'kua'mũ chu'ũ.

¹⁵ Jã'ata'ni Dios chu'ũni chiiũ chu'ũ chuta'a jãaamarũmũna chẽasi'kua'mũ na'a pa'isirũmũna Repaũni cho'oche'te cho'okaau chini.

¹⁶ Chura Repaũ'te chu'ũ're'orũmũjekũna chu'ũpi Repaũ chu'ore asa chẽa Mamakũni cuasakũ jovo Jesucristo'te cuasache kũachũ'ore judío peonani chu'vajaau chini cho'okaisi'kua'mũ Repaũ chu'ũ're. Repaũ'te jovosirũmũ Repaũ chu'ore che'chera chini chekũnare Jesure cuasanare sẽejaimanesi'kua'mũ chu'ũ.

¹⁷ Ũcuachi'a chu'ũ're na'a charo Jesucristo saosinare Jerusalén pa'inare sani ñamanesi'kua'mũ chu'ũ. Jã'aja'ñe cho'oma'ñe teana Arabia cheja pãĩ peocheja saisi'kũpi na'a pa'isirũmũna Damasco vũ'ejoopona co'isi'kua'mũ chu'ũ.

¹⁸ Choteũsurũmũ pa'isirũmũna Pedroni ña masira chini Jerusalén vũ'ejoopona sani ũcuau'na'me quincerepaumucujña pa'isi'kua'mũ chu'ũ.

¹⁹ Jã'ata'ni reparũũ chekũnare Jesús saosinare te'eũ'terejẽ'e ñamanesi'kua'mũ chu'ũ. Maire Paakũ cho'jeũ'te Santiago'techi'a ñasi'kua'mũ chu'ũ.

²⁰ Dios asaku'te jorema'ñe chu'o ũcuarepare kũakũ ie chu'o tocha saomũ chu'ũ mũsanukonare.

²¹ Repanare ñacuhahirũmũ ũcuachejapi Siria chejana'me Cilicia cheja saisi'kua'mũ

ch'u'u. ²² Mai majapãijana Judea cheja pa'ijũ Cristo'te cuasakuanupũ reparũmũ chũ'ure ñamanajejũ vesusinaa'me. ²³ Reparũmũ pã chũ'u pa'iche cutuche ija'che chiiche'te asajũ paniasome: "Aperũmũ maire Jesure cuasache'te ñseku cacũ'ora chini cu'ache cho'okũ pa'isi'kũ chura pãipi Jesuni cuasaa'jũ chini Dios chũ'ore chũ'vakũ pa'iuasomũ", chiijũ paniasome pã. ²⁴ Jã'aja'ñe chũ'u cho'oche'te asajũ reparũmũ Dioni, "Re'orepamũ, Ja'kũ", chiijũ paniasome repaña.

2

Chekũna Jesús saosina Pablo'te pojosi'ere kũamũ

¹ Catorcereaũsurũmũ pa'isirũmũna Bernabena'me Jerusalén vũ'ejoopona jo'e saiũ Titore ja'me saku saisi'kũa'mũ chũ'u. ² Diopi chũ'ũũna Repaũ'te cuasanare ũcuaukore chũ'ũnarechi'a cutura chini saisi'kũa'mũ chũ'u repacheja. Chi'i chũ'u judío peonare Dios chũ'o chũ'vache'te kuasi'kũa'mũ chũ'u repanare, kũaũna masijũ repañapi ñsemapũna chũ'u cho'ocheji cho'osomaneakũ chini. ³ Reparũmũ Titore chũ'ũna'me saisi'kũre griegopãiujekũ jĩkomu chã'tiro pa'ica'nirũ chũto tuacojñomanesi'kũreta'ni, "Jĩko ca'nirũ chũto tuacojñojũ'ũ", chiijũ chũ'ũmanesinaa'me repaña. ⁴ Pã chekũnapi maini Jesure ũcuarepa cuasanani, "Jesure cuasanaa'me chũkũna", chiijũ jorenapi ja'me chi'ijũ ke'rejũna saisi'kũa'mũ chũ'u. Repaña jorena maipi Jesucristo neenajejũ mai rekoñoã cuasache'te

re'oja'chere cho'ojuna ñañu chini raisinaa'me, ña pi'ni chukuna'te pa'ivesache peore chukuna judío aipāi chũ'u jo'kasi'ere cho'oche'te chũ'uñu chini. ⁵ Jã'ata'ni chukuna musanukonapi Dios chũ'o ũcuarepare Jesucristo'te cuasache kuachũ'ore ũcua cuasaju paapu chini repaña joreju i'kache jmamakarujẽ'e asa cho'oma'ñe ũcua ũcuarepare cho'ojũ pa'inaa'me.

⁶ Jã'ata'ni Diopi pãi ũcuanukore ũcuapa'rũvachi'a cuasakuna Repau'te cuasanare chũ'unare vajuchumanesi'kua'mũ chũ'u. Ũcuachi'a chũ'upi repaña chũ'una pa'icheja'che pa'ina chũ'ure pojojũ, "Ija'che chũ'vajaijũ'u mu'u", chiiju chũ'umanesinaa'me repaña chũ'ure. ⁷ Repau Jesucristo'te cuasache kuachũ'ore judíopãire chũ'vaa'kũ chini Dios Pedro'te jo'kasi'ejache chũ'ure Repau ũcuachũ'ore judío peonani chũ'vajaau chini jo'kasi'e chũ'upi kũauna asa, masisinaa'me repaña. ⁸ Repau Dios Pedro'te judíopãire chũ'vaa'kũ chini jo'ka Cho'okaikũji chũ'ure ũcuachi'a Ũcuauji jo'ka judío peonani chũ'vaa'kũ chini cho'okaikũ'mũ. Jesús saosinaa'me chukuna ka'chana.

⁹ Jã'ajekuna repaña Jesure cuasanare chũ'una Santiagona'me Pedrona'me Juan chũ'u Jesús saosi'kũ pa'iche'te asa pojojũ chukuna'te Bernabena'me chũ'ure ija'che i'kasinaa'me: "Musanukona chukunaja'ñe pa'inaa'me", chiiju, "Musanukonapi judío peonani Dios chũ'ore chũ'vato re'omũ; chukunata'ni judíopãire ũcua chũ'vajũ pa'ijanaa'me", chiisinaa'me.

¹⁰ Iechi'a i'ka jo'kasinaa'me repana chukuna'te: "Chuova'na pa'iva'nare cavesuma'ne cuasaju re'oja'che cho'okaiju pa'ijũ'u", chiisinaa'me. Jã'ata'ni chukuna ũcuare si'arumu cho'uju pa'inaa'me.

Pedroji jo'e cho'omanea'ku chini Pablo i'kasi'ea'me

¹¹ Na'a pa'isirumu chu'u Antioquia v'ejoopo co'isirumu Pedroji ũcuajoopo'te rani pa'iu cu'ache cho'okuna ñaku jo'e jã'aja'ne cho'omanea'ku chini i'kasi'kua'mu chu'u repau'te. ¹² Reparumu Jerusalén v'ejoopo Santiagona'me pa'ina chuta'a raimarumu judío peonana'me ãu ãiu pa'isi'kua'mu repau, judíopãiota'ni. Jã'ata'ni repana raisirumu vajuchuku repauni pe'rumanea'ju chini judío peonare cuhekũ pa'icheja'che ja'me pa'imanesi'kua'mu repau, judío peonarejatũ'ka jĩkomu chã'tiro pa'ica'niru chũto tuacojño'ne chũ'unapi ratena. ¹³ Jã'aja'ne Pedroji ũcuarepa peoche'te cho'okuna chekuna judíopãi ña ũcuaja'che cho'osinaa'me. Bernabejatũ'ka repana cho'оче ña ũcuaja'che cho'osi'kua'mu. ¹⁴ Repanapi Cristo chu'o ũcuarepa chũ'ũ'ne'te masi cho'omaruña ña repana asaju'te Pedro'te ija'che i'kasi'kua'mu chu'u: "Mu'u judíopãiota'ni peore mai judío aipãi jo'kasi'e cho'oma'ne judío peokuja'che pa'ikũ'mu. Jã'aja'ne pa'ikuta'ni chura judío peonare, 'Musanukona pa'iche cu'amũ', chiiũ judío pa'iche paapu chini chũ'ukuja'che cho'omu mu'u", chiisi'kua'mu chu'u repau'te.

15 Ija'che i'kasi'kua'mu chu'u: "Mai chiirumuna teana judiopai aineesinaa'me. Jã'ajekuna judio peona cho'очеja'che cu'ache cho'omanaa'me mai. 16 Jã'ata'ni ie masime mai: Diopi ñato Repauji chũ'una Moisés tocha jo'kasi'e cho'ona pãi te'eujẽ'e re'oku peojuasome. Jesucristo'te cuasanachi'aasome re'ona, Repauji ñato. Pãi ũcuauanare re'oja'chechi'a cho'ona pa'uatato Jesucristoni cuasaju jovoche pa'im. Jã'ajekuna mai judiopai Repau chũ'u jo'kasi'e cho'ojũ aineesinata'ni Jesucristo'te cuasaju jovosinaa'me, Diopi mai cu'ache cho'оче'te tũnosokani jo'e cuasama, 'Re'onaa'me ina', chiaũ chini. Repau aperumu chũ'u jo'kasi'e cho'onareta'ni te'eũ'terejẽ'e, 'Re'onaa'me ina', chiima'kua'mu Repau, repare peore cho'omaru.

17 'Mai aperumu cu'ache pa'isinaa'me. Jã'ajekuna re'ona pa'ũ chini, 'Cu'ache cho'onaa'me chũkuna', chijũ Jesucristoni cuasaju jovosinaa'me mai. Jã'ata'ni chekuna judiopai Jesure cuasamana ija'che i'kame maire: 'Jesucristoji cho'okaiuna judiopai re'oja'che pa'isina mai judiopai pa'iche'te jo'kaso chura cu'ache pa'ime ina', chiime. Jã'ata'ni joreme repana. Jã'aja'ñema'mu. Jesucristo jmamakarujẽ'e cu'ache cho'oma'kua'mu.

18 Chu'upi Dios pa'ichejana sasa chini aperumu chũ'u jo'kasi'e cho'osi'kupi Jesucristoni jovo chu'u cho'osi'e ũhaso pa'ikupi churana ũcuare cho'oku re'oku pasa chini jo'e cho'oni Jesucristo chũ'ũne'te cho'oma'ne pa'im. 19 Aperumu, 'Chu'upi Dios chũ'u jo'kasi'e peore cho'omaneni cho'osoja'mu', chiuũ cuasasi'kua'mu chu'u.

Jã'are masikũ cho'oche Diore pojojũ aperũmũ cho'osimajñarũãchi'a jo'kaso Jesucristoni cuasakũ jovosi'kũa'mũ chũ'u Diona'me re'oja'che pa'iu Repau chiiche'te cho'okũ pasa chini.

²⁰ 'Jesucristo jũni ro'ikaicojñosi'kũjekũ kurusẽ'verona Repau'te jẽ'jo vẽasosi'eja'che cho'ocojñosi'kũa'mũ chũ'u. Jã'ajekũna chũ'u chura chũ'upi meñe jũni ro'isi'eja'che pa'iu chũ'u chiichejẽ'e cho'oma'ñe Cristoji cho'okaiũna Repau chiichechi'a cho'okũ pa'ikũ'mũ. Repau'te Dios Mamakũ'te chũ'uni oiũ Repauji meñe ñsikũ chũ'ure jũni ro'ikaisi'kũni cuasakũ chũ'u icheja cheja pa'irũmũ cho'oche peore cho'okaiũ pa'ikũ'mũ chũ'u. ²¹ Dios chũ'ure cho'okaiche cuhema'mũ chũ'u. Ũcuaũji chũ'ũna Jesucristo maire jũni ro'ikaisi'kũa'mũ maini Ũcuaũna'me re'oja'che pa'ire'oa'kũ chini. Aperũmũ chũ'u jo'kasi'ere cho'ojũna maini Diona'me re'oja'che pa'ire'oche pa'ito Cristo maire jũni ro'ikaisi'e jũnite'esi'e pa'ira'amũ. Maipi re'oja'che cho'o koka peojũna jã'aja'ñe Repau aperũmũ chũ'u jo'kasi'e cho'ojũ Diona'me re'oja'che pa'icu'amũ maire. Jã'ajekũna Cristo maire oiũ maire cho'ovesache'te cho'okaiũ jũni ro'ikaisi'kũa'mũ maire Diona'me re'oja'che paarpũ chini", chi-isi'kũa'mũ chũ'u.

3

Dios pa'ichejana sañu chini Repau aperũmũ chũ'u jo'kasi'e cho'oma'ñe Diore cuasache'te kũamũ

1 Asarepajũ'ũ, Galacia cheja pa'ina. Jorena chu'vachu'ore ruarepa asaju vë'vena carũnisosinaa'me musanũkona. Aperũmu chũkuna musanũkonare Jesucristo maire jũni ro'ikaisi'ere pe'kerũji ruu masi kuasinaa'me. 2 ¿Je'se cho'ojũ Dios Rekocho koore musanũkona? ¿Dios aperũmu chũ'ũ jo'kasi'ere peore cho'ojũ koore? Pãasinaa'me. Repau chu'o re'oja'chere asa chẽa Jesuni cuasaju koosinaa'me musanũkona Repau Rekocho. 3 Jã'ata'ni chura, ¿je'se pa'ũna Dios cho'okaiche'te cuheju ruu aperũmu chũ'ũ jo'kasi'ere cho'ojũ Dios pa'ichejana saiche cuasache musanũkona, Jesure apucasarũmu Dios Rekocho koosinata'ni? Ruu tĩĩne cuasame musanũkona. 4 Jesuni cuasaju cu'ache ti'jĩecojĩona cu'are juvo koka paaju re'oja'che pa'iche na'a ruu che'cheme. ¿Musanũkona jã'aja'ĩne che'chemanere? Che'chesinaa'me. 5 Dios musanũkonapi Repau chu'o asa chẽasi'ere cuasajũna Repau Rekocho'te ĩsi musanũkona cho'ocheji Repau cho'omasiche pãi vasoche cho'okaiku'mũ. Musanũkonapi aperũmu chũ'ũ jo'kasi'ere masi cho'ojũna cho'okaichema'mũ jã'a.

6 Abraham pa'isi'ere cuasajũ'ũ. Dios chu'o aperũmu tocha jo'kasi'e ija'che kuamu repau pa'isi'e:

Abrahamre Repaũni cuasakuna, "Re'oku'mũ iku", chiniasomu Dios, chiimũ. 7 Ie masiche pa'imũ musanũkonare: Diore masi cuasana Abraham jojosinajanaa'me repau cuasacheja'che Diore cuasanajeju. 8 Dios judío peonare Repaũni cuasajũna cu'ache

cho'omanare cuasacheja'che cuasaku Repau
repanare cho'okaijachere kuaku Abrahamre
i'kasi'e Repau chu'o re'oja'che aperumu tocha
jo'kasi'e ija'che kamu:

Mu'upi chu'uni masi cuasakuna mu'u jojojure
icheja chejana raoja'mu chu'u
si'avajupaire re'oja'che cho'okaiu paau chini,
chiimu Abrahamre Dios i'kasi'e. ⁹ Jã'ajekuna
Dios Repau'te masi cuasanare Abrahamre
Repauni masi cuasakuna cho'okaisi'aja'che
re'oja'che cho'okaimu.

¹⁰ Pãi Dios pa'ichejana sañu chini cuasaju
Repau aperumu chu'u jo'kasi'e cho'ona vati
toana sani cho'osojanaa'me. Repau chu'o
aperumu tocha jo'kasi'e ja'are ija'che kamu:
Dios aperumu chu'u jo'kasi'e tocha jo'kasikorovu
pa'iche'te cho'oju

peore si'arumu masi cho'omanesina pa
ucuanuko cho'osojanaa'me,
chiimu. ¹¹ Chekucheja ija'che kamu:
Diopi ñato Repau'te cuasana re'onaa'me.

Jã'ajekuna repaana Ucuana'me si'arumu
re'oja'che pa'ijanaa'me,

chiimu. Aperumu Repau chu'u jo'kasi'ere
cho'oju re'ona pañu chiinare pa te'eu'terejẽ'e,
"Re'onaa'me ina", chiima'mu Dios. ¹² Aperumu
Repauji chu'unna Moisés tocha jo'kasi'e Diore
cuasache i'kama'ne, chu'usi'e cho'ochечи'a
i'kamu. Repau chu'o tochasikorovu ija'che
kamu:

Dios chu'u jo'kasi'e peore masi cho'ona Repau
pa'ichejare ai sani pa'ijanaa'me,
chiimu.

13 Jã'ata'ni Cristo maire, Dios chũ'u jo'kasi'ere cho'ovesujũ te'eujẽ'e peore masi cho'omapũ vati toa uura'asinare, mai cu'ache cho'oche jũni ro'ikaisi'kua'mũ, maipi vati toana saimanea'jũ chini. Maipi cu'ache cho'ocojñomanea'jũ chini mai cho'ocojñora'asi'e Ũcuauji mai cu'are peore ro'ikaiũ si'ache cu'ache cho'osi'kũ cho'ocojñoñeja'ñe cu'ache cho'ocojñosi'kua'mũ Repaũ. Dios chũ'o aperũmũ tocha jo'kasi'e ija'che kũamũ jã'a:

Pãiu'te tiripũna jẽ'jo nukocojñokũ'te ñani,
 “Repaũ cu'ache cho'osi'e ro'ia'me ie”, chii-
 janaa'me pãi,

chiimũ. 14 Jã'ajekũna Dios maire irũmũ Repaũ aperũmũ Abrahamre, “Mũ'u jojocojñojaure si'avãjũpãire re'oja'che cho'okaaũ chini raoja'mũ chũ'u”, chiisi'ere ũcuarepa cho'okũ Jesucristo'te chejana raosi'kua'mũ, mai cu'are jũni ro'ikakũna maipi Repaũ, “Cho'okaija'mũ”, chiisi'ere si'avãjũpãi Jesuni cuasajũ Repaũ Rekocho'te kooa'jũ chini.

Abrahamre cho'okaija'mũ chiisi'ena'me Moiser chũ'u jo'kasi'ere kũamũ

15 Chũ'u majapãijana, ija'chea'me jã'a: Pãiuji repaũ cho'oja'mũ chiiche'te kũakũ tocha pi'ni mami tocharu chekũpi jo'e na'a rũa kũakũ tochacu'amũ jã'a. Ũcuachi'a sējocu'amũ. Jã'aja'ñea'me Dios cho'oja'mũ chiisi'e. 16 Dios Abrahamre Repaũ cho'okaijache i'karũmũ repaũ jojocojñojanare jainũkore i'kama'ñe te'eũ pa'ijachechi'a i'kaasomũ repaũ jojocojñojau pa'ijachere. Cristoa'mũ repaũ jojocojñosi'kũ.

17 Jã'arumupi cuatrocientos treintarepaũsurumũ pa'isirumũna Dios pãipi ñaju cho'oju paapu chini Repau chũ'ũne Moiseni jo'kaasomũ. Jã'ata'ni reparumũ Abrahamre Repau charo i'kasi'e ũhasomaneasomũ Repau. Repa Abrahamre i'kasi'e ũcua pa'iu ũcuarepa cho'ocojñocuhamũ. 18 Diopi Repau aperumũ chũ'u jo'kasi'e cho'onani vati toa uuche'te ũsekaito Abrahamre Repau na'a charo i'kasi'e jorechũ'o pa'ira'asi'kua'mũ. Jã'ata'ni Dios maini oiũ Repau Abrahamre jã'aja'ne cho'okaija'mũ chiisi'e ũcuarepa cho'osi'kua'mũ.

19 Chekurumũ musanukona chu'u i'kaku tochache ija'che cuasaju i'kacosome: "Jã'a pa'ito pãipi ñaju cho'oa'ju chini Moisés tochasi'e, ¿je'se cho'ora chini chũ'ũ Repau?", chiicosome. Ija'chea'me: Pãipi Abraham jojocojñosi'kure Jesucristo'te raorumujatu'ka repa chũ'u jo'kasi'ere ña, "Chu'u cu'akujeku Dios chiiche re'oja'che cho'ovesumũ", chiiju cuasaa'ju chini jo'kasi'easomũ jã'a. Repa aperumũ chũ'usi'e Moiseni ángelepi kuajuna tocha jo'kaasomũ maire. 20 Jã'ata'ni Dios Abrahamre i'kasi'e ángelepi kuakaapu chini chũ'uma'ne ũcuarepaũji i'kasi'ejeku na'a re'omũ.

Dios Repau cho'ora chiiche'te Moiserẽ chũ'u jo'kakũ kuasi'ere kũamũ

21 Jã'ajekuna Dios Repau Moiserẽ chũ'u jo'kasi'e Abrahamre Repau i'kasi'ere ũhasora chini jo'kasi'emauasomũ jã'a. Maipi Moisés tocha jo'kasi'ere peore masi cho'oju pa'ito Diona'me re'oja'che pa'ire'ora'amũ maire.

Jã'ata'ni te'eujẽ'e Dios chũ'u jo'kasi'e cho'o koka peome mai. ²² Dios chũ'o aperũmu tocha jo'kasi'e ija'che kuamu: Pãi ũcuanũko cu'achechi'a cho'oju, pani etajaichejẽ'e peoche pa'ime, repaña cu'ache cho'oche ro'ijanajeju. Jã'ata'ni pãipi Jesucristoni cuasani Dios cho'okaija'mũ chiisi'e re'oja'che cho'okaicojñojanaa'me.

²³ Jesucristo'te cuasache chuta'a tĩ'amarũmu chũkũna judiõpãni cu'ache pa'iju Dios aperũmu chũ'u jo'kasi'e peore masi cho'ovesũsinaa'me. Repare cho'ovesuju pani etajaichejẽ'e peoche pa'iju Dios Mamaku rajachere cha'aju pa'sinaa'me chũkũna. ²⁴ Dios chũ'u jo'kasi'e chũkũna'te aperũmu chĩi kuirakaiku cho'ovesũnani si'ache chũ'ũkuja'che Jesucristo rairũmujatu'ka pa'isi'kuamũ, repare cho'ovesujũna. Jã'aja'ne pa'isinare Dios chũkũna'te Jesucristo pa'iche'te asa chẽa ũcuaũni cuasajũna, "Re'onaa'me ina", chiimũ chura. ²⁵ Jã'ajekũna chura Jesucristo'te cuasanajeju Dios pa'ichejana saũu chini Repau aperũmu chũ'u jo'kasi'e cho'osina ũcuamakarũ cho'oũu chiime chũkũna. ²⁶ Mũsanũkona ũcuanũko Jesucristo'te cuasanajeju Dios chĩia'me. ²⁷ Mũsanũkona ũcuanũko Repau ni cuasaju okoro'vecojñosina chura Cristo pa'icheja'che re'oja'che pa'inaa'me. ²⁸ Maire Jesucristo'te cuasanare ũcuapa'rũvachi'a cuasamu Dios, judiõpãina'me judiõ peonare, pãi chũ'ũnana'me chũ'ũcojñoñare, mũmpãina'me romi. Mai ũcuanũko Jesucristo'te cuasanajeju ũcuate'eajakuanupũ'me.

29 Ûcuachi'a Jesús neenajeju Abraham jojocojñosinaja'ñe pa'ijũ Dios aperũmũ re'oja'che cho'okaija'mũ chiisi'ejekũna repau'te re'oja'che cho'okaicojñojanaa'me musanũkona.

4

1 Ija'chea'me: Kuriũ mamaku pũka'ku jũnisosirũmũ repau'ji chuta'a chĩiva'ũ pani pũka'ku paasi'e peore paava'uta'ni rupũ chẽa paacojñoova'ũja'ñe pa'imũ. ² Repau ainee pi'nirũmũjatũ'ka repau'te kuiranana'me repau paache kuirakaina chũ'ũñe'te cho'oche cho'okaiũ pa'iche pa'imũ repau'te pũka'ku i'ka jo'kasirũmũjatũ'ka. ³ Mai ùcuaja'che chuta'a Jesure cuasamarũmũ chĩiva'naja'ñe pa'ijũ Repau'te cuasamanare chũ'ũna vati chũ'ũñe'te cho'okaiju pa'isinaa'me. ⁴⁻⁵ Jã'ata'ni Dios, Repau i'ka jo'kasirũmũ tĩ'auna Mamaku'te chejana raosi'kũa'mũ, pãioji paaona judiõpãiujekũ Repau aperũmũ chũ'ũ jo'kasi'ere cho'oku ainee pi'ni Repau majapãire repa na cu'are jũni ro'ikakũna Dios pa'icheja saũu chini aperũmũ chũ'ũ jo'kasi'ere ùcuamakarũ cho'oa'ju chini. Ûcuachi'a maipi ùcuanaũko Repau chĩi paaru chini jã'aja'ñe cho'oasomũ Dios. ⁶ Repau Mamaku cho'okaisi'ejekũna Maire Repau chĩijeju na mai rekoñoõna Repau Rekocho raosi'kũa'mũ Dios. Jã'ajekũna Repau'te Diore Ûcuau Rekochoji cho'okaiũna vajũchũma'ñe, "Ja'ku", chiinaa'me mai. ⁷ Jã'aja'ñejekũna chura oicojñooma'ñe rupũ cho'ochechi'a cho'okaaru chini chẽa paacojñoomanaa'me mai. Dios

chĩia'me. Repaũ chĩijeju Ũcuauji ĩsikuna koojanaa'me mai Repaũ paache peore.

“Jesure cuasanapi cacu'asojũ”, chini cuasaku oimũ Pablo

⁸ Aperaũmũ mũsanũkona chuta'a Diore cuasaju jovomarũmũ, ruũ tũosiva'nare diomañere pojosinaa'me, Diorepaũ'te cuasaju pojocheja'che. Jã'ajekuna ruũ tũosiva'na chẽa paacojñonaja'ñe pa'isinaa'me. ⁹ Chũkuna judíopãita'ni Jesure chuta'a cuasamarũmũ Dios aperaũmũ chũ'ũ jo'kasi'e cho'ojũ pa'isinaa'me. Chura mũsanũkona chũkuna judíopãi fiestaumucujña cho'ocheja'che si'ache cho'ojũ pa'ijũasome, Diopi ña, “Re'onaa'me ina”, chiaũ chini. Mũsanũkona chũkuna judíopãi Jesure jovorũmũ jo'kasosi'ere cho'ojũ mũsanũkona jovorũmũ jo'kasosi'ere co'icheja'che jo'e cho'ojũ cho'ote'eme. Jesure jovosinajeju Dios pa'iche'te masiju Repaũ'te cuasanaa'me mũsanũkona. Ũcuachi'a Dios mũsanũkonare masimũ. Jã'aja'ñe pa'inata'ni, ¿jo'e tũosiva'na chẽa paacojñosi'ejja'che pañu chiiche? ¹⁰ Fiestaumucujña judíopãi cho'ocheja'che si'ache cho'ojũ pa'ijũasome mũsanũkona, Diopi ña, “Re'onaa'me ina”, chiaũ chini. ¹¹ Mũsanũkona jã'aja'ñe cho'oche'te asaku, “Chũ'ũ repanare chũ'vasi'e peore cavesusocuhacosome”, chiiũ rũa sũma'ñe cuasaku pa'imũ chũ'ũ.

¹² Asarepajũ'ũ, chũ'ũ majapãijana. Chũkuna judíopãi pa'iche jo'kaso mũsanũkona judío peona pa'icheja'che pa'ikũ'mũ chũ'ũ. Chura

mʉsanʉkonare chʉ'u Diore cuasarepakʉ pa'icheja'che pa'ijũ'u, chiimʉ chʉ'u. Mʉsanʉkonare ja'me pa'irumʉ cu'ache cho'omanesinaa'me mʉsanʉkona chʉ'ure. Irumʉ ũcuachi'a chʉ'ure cu'ache cho'oma'ñe chʉ'u i'kache'te asajũ'u. ¹³ Mʉsanʉkona chʉ'u pa'ia cho'osi'e masime. Reparumʉ Jesucristo'te cuasache kʉachʉ'o mʉsanʉkonare chʉ'u chareparo chʉ'varumʉ ravʉ jũ'ikʉji chʉ'vasi'kʉa'mʉ chʉ'u. ¹⁴ Mʉsanʉkona chʉ'upi jũ'iana chʉ'ure ña vajuchʉsinaa'me. Jã'ata'ni chʉ'ure, "Jũ'imʉ iku", chini cuhemanesinaa'me. Cuhema'ñe ángel'te Dios raocojñosi'kʉre ña pojocheja'che pojosinaa'me mʉsanʉkona chʉ'ure. ũcuachi'a Jesucristo'te ña pojocheja'che pojosinaa'me mʉsanʉkona chʉ'ure. ¹⁵ Jã'aja'ñe pojojʉ pa'isina, ¿chura je'se cho'ore mʉsanʉkona pojojʉ pa'isi'e? ¿Cavesusocuhare? Reparumʉ mʉsanʉkona chʉ'ure peore cho'ore'ochetʉ'ka re'oja'che cho'okaijʉ cho'ore'oche pa'ito mʉsanʉkona ñakocaãjatʉ'ka ru'te isira'asinaa'me chʉ'ure. ¹⁶ Chura mʉsanʉkona chʉ'upi chʉ'o ũcuarepare i'ka'na, ¿chʉ'ure cuhena carũnisore?

¹⁷ Repana tii'ne chʉ'vana mʉsanʉkonare rua chʉ'vaneenata'ni repa rekoñoã re'oja'che cuasamanajejʉ re'oja'che cho'okaicuheme. Mʉsanʉkonapi chʉkʉnani cuhejʉ repanarechi'a chiijʉ paarpʉ chini i'kame repa. ¹⁸ Mʉsanʉkona chekʉnare pãi chiito re'omʉ. Jã'ata'ni re'oja'che cho'okaichejẽ'e cuasama'ñe rupʉ chiito cu'amʉ. ũcuachi'a mʉsanʉkonapi chʉkʉna'te ja'me pa'irumʉchi'a chiito cu'amʉ.

Chiirepana pani te'eñoã chiima'ñe si'arumũ chiiju pa'ime. ¹⁹ Asarepajũ'u, chũ'u chiijana. Mũsanũkona pa'iche'te ña jo'e chũ'u rekocho romio chĩipi'rasi'ko asikũna oicheja'che oimũ chũ'u. Mũsanũkona Cristo pa'icheja'che re'oja'che pa'iche che'chesirumũjatũ'ka jã'aja'ñe oimũ pa'ija'mũ chũ'u mũsanũkonare. ²⁰ Mũsanũkonani na'a masi chũ'vara chini ja'me pasa chini oimũ chũ'u. Jã'ata'ni so'ore pa'iu mũsanũkona pa'iche'te ñamaũna masi chũ'vacu'amũ chũ'ũre.

Agana'me Sara pa'isi'ere kũamũ

²¹ Mũsanũkona aperumũ chũ'u jo'kasi'e cho'oñu chiinata'ni asavesũme repa kũache. ²² Ija'che kũamũ: Abraham te'eka'chapanare chĩi paaasomũ, chẽa paacojñoko mamakũna'me rũjorepao mamaku'te. ²³ Chẽa paacojñoko mamaku rupũ chĩi si'arumũ paacheji paacojñooasomũ. Rũjorepao mamakũta'ni Dios ñisija'mũ chiicojñosi'kũjekũna Ũcuauji ñisiũna chĩi paacu'asi'kopi paaasomo. ²⁴ Repana romi te'eka'chapana pa'iche Dios, "Ija'che cho'oñu", chiisi'e ka'chamajñaja'ñe pa'iu, Dios maire cho'okaiche'te kũamũ. Aperumũ chũ'u jo'kasi'e cho'ochena'me maire jũni ro'ikaisi'kũre Jesucristo'te cuasajũna Repau cho'okaiche kũamũ repana pa'iche. Aperumũ chũ'u jo'kasi'e cho'ona chẽa paacojñonaja'ñe pa'ime. Chẽa paacojñosi'ko Agar pa'isi'e Sinaí aikũti pa'irumũ chũ'ũsi'ere kũamũ. ²⁵ Repao Agar pa'iche repaona'me mamachĩi chẽa paacojñonachi'ajeju Arabia cheja pa'ikũti Sinaí

aikũti chũ'u jo'kasi'ena'me Jerusalén vü'ejoopo irumũ pa'ijoopo pa'iche'te kũamũ. Jerusalén vü'ejoopo pa'ina judíopãi Dios pa'ichejana sañu chini Repau aperumũ chũ'u jo'kasi'e cho'onajeju ũcuanũko chẽa paacojñonaja'ñechi'a pa'ime. ²⁶ Jã'ata'ni cũnaumũ pa'ijoopo mama Jerusalén vü'ejoopo chẽa paacojñona pa'ijoopoma'mũ. Mai repajoopo pa'inaa'me maire jũni ro'ikaisi'kũre Jesucristo'te cuasanajeju; rãjorepao Sara mamachĩjanaa'me. ²⁷ Dios chũ'o aperumũ tocha jo'kasi'e jã'are ija'che kũamũ:

Chĩ paacu'akũna chĩ peova'ota'ni pojoko pa'ijũ'u mũ'u.

Chĩ paamanesi'kota'ni pojoko cuiko sojũ'u.

Mũ'u jojojanare rũa jainũkore paaja'mo mũ'u.

Irumũ muũju chĩ paako'te na'a rũa jainũkore paaja'mo mũ'u,

chiimũ. ²⁸ Asarepajũ'u, chũ'u majapãijana. Mũsanũkona Dios Abrahamre, “İsija'mũ chũ'u mũ'ũre”, chini İsicojñosi'kũ Isaac pa'icheja'che pa'ime. Mũsanũkona cho'okaicojñojañere i'kakũ, “Mũ'u jojojaũre chejana raoja'mũ chũ'u, si'avãjũpãire re'oja'che cho'okaau chini”, chinasomũ Dios repau'te Abrahamre.

²⁹ Reparumũ repau mamakũ rupũ chĩ si'arumũ paacheji Agar paasi'kũpi chekũni Dios Rekochoji cho'okaiũna rãjorepao Sara mamakũni Isaani cu'ache cho'okũ paniasomũ. Irumũ ũcuaja'che pa'imũ. Maire Jesure cuasanare Dios aperumũ chũ'u jo'kasi'e cho'onapi rũa cuheju pa'ime.

³⁰ Dios chũ'o aperumũ tocha jo'kasi'e ija'che kũamũ:

Chêa paacojñoko'te repao mamakuna'me eto saosojũ'ũ.

Repao mamakũji puka'ku paache'te koomanea'ku;

rũjorepao mamakũji puka'ku paache'te kooa'ku, chiimũ. ³¹ Asarepajũ'ũ, chu'ũ majapãijana. Dios pa'ichejana sañu chini Repau aperumũ chũ'ũ jo'kasi'e cho'omanajeju chêa paacojñosi'ko chĩ pa'icheja'che pa'imanaa'me mai. Jesucristo'te cuasanajeju rũjorepao mamachĩija'ñe pa'ijũ Dios chĩia'me mai.

5

Jo'e chêa paacojñonaja'ñe pa'ima'ñere kũamũ

¹ Cristo maire chêacojñosinani etocheja'che cho'okaniasomũ, maipi re'oja'chere maire cho'ouache'te cho'omasia'ju chini. Jã'ajekuna ñarepaju pa'ijũ pãipi Dios aperumũ Repau'te pojojũ cho'oche chũ'ũ jo'kasi'ere cho'oa'ju chini musanukonani chũ'uto juvo koka paaju cho'omanejuũ'ũ, jo'e chêa paacojñonaja'ñe pa'imaneñu chini.

² Asarepajũ'ũ. Chu'ũ, Pabloji, musanukonare cacu'amana'ju chini i'kamũ. Musanukonapi jĩkomu chã'tiro pa'ica'nirũ chũto tuacojñoni Cristo musanukonare cho'okaisi'e karakuna cho'ocheja'che cho'ojanaa'me. ³ Jo'e ũcuare i'kara. Pãĩ jĩko ca'nirũ chũto tuacojñonare ũcuanukore Dios aperumũ chũ'ũ jo'kasi'e peore masi cho'oche pa'imũ. ⁴ Musanukona te'ena Dios aperumũ chũ'ũ jo'kasi'ere cho'oju Repau'ni, "Re'onaa'me ina", chiicojñoñu chini cho'onajeju Repau re'oja'che cho'okaisi'ere cuhenajeju

Cristona'me pa'imanaa'me. ⁵ Chukunata'ni Dios pa'ichejana sañu chini Repaü aperümü chũ'u jo'kasi'e cho'oma'ñe Dios Rekochoji cho'okaiüna Jesure cuasanajeju jmamakarujê'e karama'ñe Diona'me re'oja'che pa'ijachere pojoju cha'aju pa'inaa'me. ⁶ Jesucristo'te cuasaju jovo pa'inare, “¿Jiko ca'niru chuto tũacojñoja'ñe chũ'u? ¿Pãaja'ñe?”, chiiu cuasachejê'e peomu. “Repaüni masi cuasaju chekunani päire ña oiju re'oja'che cho'okaiju pañu”, chiiju cuasache'me re'oja'che.

⁷ Rua re'oja'che pa'isinaa'me musanukona. ¿Neepi cho'orena Jesús pa'iche kũachũ'o Dios chũ'o ũcuarepa i'kache cho'osinata'ni jo'kasore musanukona? ⁸ Musanukonare chẽa paaku Dios chũ'usi'ema'mu jã'a, Repaü chũ'o ũcuarepare päipi jo'kasoa'ju chini i'kache. ⁹ Ija'che i'kanaa'me päi: “Pã sauca'reru jmaca'reruji harinaca'repu ujaca'repuna maña ja'meru peore repaca'repu kosa na'a ujaca'repu saumu”, chiime. Ũcuachi'a chekũrumu päiu te'euji jorechũ'ore che'choku pani chekunare päi jainukore cacũ'omu. ¹⁰ Maire Paakuji cho'okaiüna musanukona masi cuasajache masimu chũ'u. Jã'ata'ni päi musanukonani cacũ'oñu chini jorechũ'o che'choju ku'inare ũcuanukore cu'ache ti'jñeñe chũ'uja'mu Dios, repana cu'ache cho'оче ro'i.

¹¹ Asarepajũ'u, chũ'u majapãijana. Chũ'u chura jikomu chã'tiro pa'ica'niru chuto tũacojñoñe chũ'vama'kua'mu. Chũ'upi chuta'a Jesure cuasanani, “Jiko ca'niru chuto

tuacojñojũ'u", chiiu chu'vaku pa'ito judíopāi chu'ure cu'ache cho'oñu chiimanagera'ame. Ūcuachi'a chu'upi, "Jiko ca'niru chuto tuacojñojũ'u", chiiu chu'vato repaña judíopāi Jesucristo kurususē'verona jūni ro'ikaisi'e kũache asa pe'rumanera'ame. ¹² ¡Repaña joreña jiko ca'niru chuto tuacojñoñe'te chũ'uju musanukonare cacu'oju ku'ina ũcuanapi meñe teaña chuto ru'tesoajũ!

¹³ Asarepajũ'u, chu'u majapāijana. Dios musanukonare uache'te re'oja'chere cho'omasia'ju chini chēa paamu. Jã'ajekuna juvoma'ñe cu'ache'te ũcuauache cho'oju pa'ima'ñe sãñechi'a oiju re'oja'chere cho'okaiju pa'ijũ'u. ¹⁴ Dios chu'o aperumũ tocha jo'kasi'e jã'are ija'che kũamu:

Musanukona meñe oicheja'che chekunare oiju pa'ijũ'u,
chiimu. Jã'aja'ñe cho'ona Dios chũ'uñe cheke peore cho'ome. ¹⁵ Ñarepaju pa'ijũ'u; musanukonapi sãñechi'a ke'reju cavache'te ũhasoma'ñe ũcua cavaju pani sãñechi'a cho'oju cacu'osoju pa'ijanaa'me.

Maire cho'ouache cho'oma'ñe Dios Rekocho chũ'uñechi'a cho'ochete kũamu

¹⁶ Jã'ajekuna musanukonare chu'vamu chu'u ie: Dios Rekocho chũ'uñechi'a cho'oju pa'ijũ'u. Jã'aja'ñe cho'oni musanukonare cho'ouache cu'a ũcuauache cho'oju pa'imanejanaa'me musanukona. ¹⁷ Dios Rekocho re'oja'checi'a Chũ'urekochojeku cu'ache cho'ochete ũsemũ maire. Mai rekoñoã ũcuaja'che

cu'arekoñoãjeku cu'achechi'a cho'ora chiïu Dios Rekocho chũ'ũñe re'oja'che cho'ocuhemu. Pãi te'eka'chapana sãĩñechi'a cavacheja'che cho'omu maire rekoñoã cu'ana'me re'oja'che. Jã'ajekuna mai cho'oñu chiiche re'oja'che koka peojũ cho'ovesunaa'me mai. ¹⁸ Jã'ata'ni maipi Dios Rekochoji cho'okaiuna Reparekocho chũ'ũñe'te cho'oju pa'ito Repaũ aperumu chũ'u jo'kasi'e cho'oche chiima'mu maire.

¹⁹ Mai rekoñoã cu'ache cho'oũache masime mai. Ija'chea'me: Rũjoromi peonare ja'me kãĩñe, ũcuachi'a ũjũpãĩ peonare ja'me kãĩñe, cu'are cuasaju cu'ache cho'oche. ²⁰ Cheke rupũ tũosiva'nare pojoche, chai cho'oche, sãĩñechi'a cuheju cavache, chekuna paamajũaruã tua paauache cuasache, na'mi pe'ruche, chekunare na'a rua masiũache, sãĩñechi'a ke'reju ja'me pa'ima'ñe, te'ekuanuchi'a pa'iche. ²¹ Chekunare pojojũ pa'ima'ñe, cono jũ'ijũ ãu ruarepa ãiju cu'ache cho'ochena'me cheke rua si'ache. Mũsanũkonare jã'aja'ñe cho'oju pa'imanea'ju chini jo'e i'kamũ chũ'u. Jã'aja'ñe cho'oju pa'ina Dios pa'icheja saimanejanaa'me.

²²⁻²³ Jã'ata'ni Dios Rekochoji cho'okaiuna ija'che cho'omasime mai: Pãi oiche, pojojũ pa'iche, cavama'ñe pa'iche, pojojũ cha'ache, re'oja'che cho'okaiche, ũsema'ñe ãsiche, ũcuarepa cho'oche, pe'kerũ pa'ichena'me cu'ache cho'oche juvomasiche. Jã'aja'ñe cho'ona re'oja'che cho'onaa'me. Jã'aja'ñe cho'oche Dios aperumu chũ'u jo'kasi'e te'emakarũjẽ'e ũseche peomu. ²⁴ Mai Jesucristo neena maire cu'ache cho'oũache juvojũ ũhasosinajeju

cho'omanaa'me chura. ²⁵ Chura Dios Rekochoji ja'me pa'iu cho'okaiuna Reparekocho chũ'uñechi'a cho'oju pañu mai.

²⁶ Maipi meñe, “Rua masinaa'me chukuna”, chiiju pojomaneñu. Ûcuachi'a chekunanani cuheju cu'ache i'kaju te'ekuanuchi'a pa'imaneñu mai.

6

Sãinechi'a cho'okaiju pa'iche'te kamũ

¹ Asarepajũ'u, chũ'u majarpãijana. Mũsanukonare ja'me pa'iku Diore cuasakuji te'eu cu'ache cho'ochẽ ñani mũsanukonari Diore masi cuasanari pe'keru i'kaju chũ'vajũ'u repau'te jo'e cho'omaneaku. Jã'ata'ni ñarepaju pa'ijũ'u; chekurũmũ repau cu'ache cho'ochẽ'te ñato mũsanukonani ùcuaja'che cho'ouaku.

² Mũsanukonare pa'ivesache pa'irũmũ sãinechi'a re'oja'che cho'okaiju pani Cristo chũ'uñe'te jachamañe cho'oju pa'ijanaa'me mũsanukona.

³ Pãiu ùcuauakuji vesukuta'ni meñe, “Rua masiku'mũ chũ'u”, chiiu cuasaku ùcuauji meñe joremũ. ⁴ Mũsanukona ùcuauko te'enachi'a pa'iche'te meñe cuasajũ'u masiñu chini. Jã'ata'ni mũsanukonari re'oja'che pani chekuna pa'iche'te ña, “Jã'anare na'a re'oku'mũ chũ'u”, chiiju cuasamañe mũsanukona pa'ichechi'a cuasaju pojojũ'u. ⁵ Diopi maini pa'iche'te si'ache jo'kauna cho'omajñaruã si'acairo cho'oju pa'iche pa'imũ maire.

⁶ Dios chũ'o che'chocojñonapi mʉsanʉkonare che'chokũ'te kuirajũ si'ache ĩsijũ pa'ijũ'ũ, repaũ chiiche.

⁷ Tĩĩne cuasamanejũ'ũ mʉsanʉkona. Dios peore ñakũjekũ pãĩ ũcuanʉko cho'oche ro'iche chũ'ũkũ'mũ. Pãĩ ũcuaũana Repaũ'te joreñũ chiito cu'amũ, peore masakũna.

⁸ Pãĩũ ũcuaũakũji repaũ'te cho'oũache'te cu'are ũcuaũache'te pojokũ cho'okũ pani Diopi chũ'ũũna cho'osoja'mũ, repaũ cu'ache cho'osi'e ro'i. Dios Rekocho chũ'ũñe'te pojokũ cho'okũ pa'ikũta'ni Dios pa'ichejana ai sani si'arũmũ re'oja'che pa'ija'mũ.

⁹ Re'oja'che cho'oche cho'o ca'nasoma'ñe cho'ojũ pañũ mai. Maipi cuhasoma'ñe ũcua cho'ojũ pani mai re'oja'che cho'osi'e ro'i koojanaa'me, Diopi Repaũ'te ʉarũmũna ĩsikũna.

¹⁰ Jã'ajekũna maire cho'ore'orũmũna pãire ũcuanʉkore oijũ si'arũmũ re'oja'che cho'okaijũ pañũ mai. Jã'aja'ñe cho'ojũ mai majapãijanani Jesure cuasanani na'a rũa re'oja'che cho'okaijũ pañũ.

Cuhacho chũ'vakũ chũ'o saosi'ea'me

¹¹ Ñajũ'ũ imajña chũ'ũ tochasimajña chũ'ũ jũtũpi rũa ʉjamajñapi mʉsanʉkonare tocha saochẽ. Inʉkorũ chũ'ũrepaũji ija'ova tocha pi'nimũ.

¹² Repana mʉsanʉkonare jĩko ca'nirũ chũto tũacojñoa'jũ chini chũ'ũna Jesucristo'te kurususẽ'verona jũni ro'ikaisi'kũre cuasanata'ni pãipi repanarechi'a chiapũ chini cho'onajejũ jã'aja'ñe cho'ome, pãire cu'ache i'kacojñomanẽũ chini.

¹³ Jã'ata'ni repana jĩko ca'nirũ chũto tũacojñosina Dios aperũmũ

chũ'u jo'kasi'e peore masi cho'omanaa'me. Repana chũ'uñe'te musanukonapi asa cho'ojuna chekunapi asa ũcuanani pojoa'ju chini jā'aja'ñe chũ'ume repana. ¹⁴ Chũ'uta'ni pāipi chũ'uni pojoa'ju chini cho'oma'kua'mu. Jā'aja'ñe cho'oma'ñe Maire Paaku Jesucristo mai cu'are ro'ikaiu kurususē'verona jē'jocojño jūni ro'ikaisi'ere pojoku kuaku pasa chiiku'mu chũ'u. Jā'achi'a cuasaku Repau'te cuasamana cho'ocheja'che cho'ocuhemu chũ'u. Jā'ajekuna repana chũ'ure cuhenaame, repana pa'icheja'che pa'imauna. ¹⁵ Diopi ñato pāi jiko ca'niru chuto tuacojñosinana'me cho'omanesina re'onama'me. Repau Rekochoji cho'okakuna repana rekoñoã re'ojarekoñoã care'vacojñosinaa'me re'ona, Repauji ñato. ¹⁶ Jā'aja'ñe pa'iche asa chēa pa'inare Diopi oiũ re'oja'che pa'iche ĩsia'ku, Repau neena ũcuarepa pa'inare ũcuanukore.

¹⁷ Pāi chũ'ure jo'e na'a ruu pa'icu'ache ke'remanea'ju, Jesucristo pa'iche'te chũ'vaku chũ'u ca'nivu asi cho'ocojño ja'jusimajña ruu paaku'te.

¹⁸ Chũ'u majapāijana, Maire Paaku Jesucristoji oiũ rekoñoãna re'oja'che cho'okaiũ paau musanukonare. Jā'aja'ñe paau.

Pablo

Dios Chu'o Kuaphuro
Koreguaje: Dios Chu'o Kuaphuro New Testament
copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022
87a345ac-83c6-51ad-8750-17a703f38bcc